



文库

王桐龄 著

中国史
中

 江西教育出版社
JIANGXI EDUCATION PRESS



文库

中国史

中

王桐龄 著



江西教育出版社
JIANGXI EDUCATION PUBLISHING HOUSE

五胡十六国之乱

西北游牧各族本与中国杂居，不能详其所自始。战国之末，诸侯力征，诸戎乃为中国所灭，余类奔迸，逸出塞外。其后族类稍繁，又复出为中国患，两汉之世，竭天下之力，历百战之苦，仅乃克之。乌桓、鲜卑、匈奴、氐羌、西域之众，悉稽首汉廷称臣仆。汉人优待异族，往往于其请降之后，即迁之内地。宣帝时，纳呼韩邪，居之亭鄯，委以侯望；赵充国击西羌，徙之于金城郡。光武时，亦以南庭数万众，徙入西河，后亦转至五原，连延七郡。而煎当之乱，马援迁之三辅。在汉人之意，以为迁地之后，即可同化于汉族，不复为中国患，不知其后之患转甚于未迁时也。魏晋之交，鲜卑、乌桓杂居于辽宁与今河北北境；匈奴遗族杂居于山陕北境；氐、羌二族杂居于陕甘四川西境；时常作乱，汉民苦之。晋武帝平吴以后，罢州郡兵。大郡置武吏百人，小郡五十人。交州牧陶璜、仆射山涛上疏争之，不听。惠帝初年，戎狄之祸渐亟，太子洗马江统以为戎狄乱华，宜早绝其原，乃作徙戎论，以警朝廷，朝廷仍不能用。元康以后，贾后之乱与八王之乱接踵而起，中原鼎沸。匈奴遗族之刘渊、石勒，鲜卑民族之慕容涉归、氐族之蒲洪、羌族之姚弋仲等，相继蜂起，黄河流域与扬

子江上流流域沦于左衽。晋室衰微，不能自立，汉族遂南迁矣。兹述其事迹如下。

第一节 前赵之勃兴与西晋之沦灭

一、刘渊之家世及其幼年事迹

先是东汉初年，匈奴降附，内徙五原、西河。其后遂留居塞内，与编户大同，而不输贡赋。议者恐其户口滋蔓，浸难禁制，欲预为之防。汉献帝建安二十二年（西历纪元二一七年），南匈奴单于呼厨泉入朝于魏。魏王操因留之于邺，使右贤王去卑监其国。单于岁给绵绢钱谷如列侯，子孙袭号，分其众为五部，各立其贵人为帅，选汉人为司马以监督之，居并州境内。南匈奴自谓其先本汉室之甥，因冒姓刘氏。魏室中叶以后，呼厨泉从子左贤王豹为左部帅，部族最强。豹子渊幼而俊异，师事上党崔游，博习经史，尝谓同门生曰：“吾尝耻随陆无武，绛灌无文。”于是兼学武事。及长，猿臂善射，膂力过人，姿貌魁伟。为侍子在洛阳，王浑及其子济皆重之。荐之于晋武帝，使经略东南，孔恂、杨珧曰：“非我族类，其心必异。”乃止。是时鲜卑秃发树机能方陷凉州。帝问将于李熹，熹因荐渊。恂曰：“渊果梟树机能，则凉州之患方更深耳。”帝乃止。东莱王弥家世二千石，弥有学术勇略，善骑射，青州人谓之飞豹。渊与弥友善，谓弥曰：“王李以乡曲见知，每相称荐，适足为吾患耳。”因纵酒长啸，歔歔流涕。齐王攸闻之，言于帝曰：“陛下不除刘渊，臣恐并州不得久安。”王浑曰：“大晋方以信怀殊俗，奈何以无形之疑，杀人侍子乎？”帝然之。

二、前赵之建国

咸宁五年，豹卒，渊代为左部帅。渊轻财好施，倾心接物，五部豪杰，幽冀名儒，多往归之。惠帝永兴元年（西历纪元三〇四年），拜建威

将军，匈奴五部大都督。成都王颖镇邺，表渊为冠军将军，监五部军事，使将兵在邺。渊从祖右贤王宣谓其族人曰：“汉亡以来，我单于徒有虚号，无复尺土。今吾众虽衰，犹不减二万。奈何敛手受役，奄过百年。左贤王英武超世，天苟不欲兴匈奴，必不虚生此人也。今司马氏骨肉相残，四海鼎沸，复呼韩邪之业，此其时矣。”乃相与谋推渊为大单于，使其党呼延攸诣邺告之。渊白颖，请归会葬，颖勿许。渊令攸先归，告宣等使招集五部，声言助颖，实欲叛之。及王浚、东嬴公腾起兵攻邺，渊请归发五部兵以击浚、腾，颖悦，拜渊北单于，参丞相军事。渊至左国城（在今山西翼宁道离石县北），刘宣等上大单于之号。二旬之间，有众五万，都于离石（今山西翼宁道离石县，即故汾州府永宁州），自称汉王，是为前赵高祖。侵略太原西河等郡，并州骚动。是时并州大饥，数为胡寇所掠，吏民万余人，皆随刺史东燕王腾（即东嬴公进爵改封）就谷冀州，号为乞活。所余户不满二万。寇贼纵横，道路断塞。光熙元年（西历纪元三〇六年），东海王越奏以刘琨为并州刺史。琨募兵上党，得五百人，转斗而前。至晋阳，府寺焚毁，邑野萧条。琨抚循劳徠，流民稍集。

是时王弥作乱，寇青徐，杀东莱太守。公师藩余党汲桑、石勒寇河北，杀冀州都督新蔡王腾（即东燕王改封），南寇兖州，刺史荀晞大破之。桑奔马牧（今山东东临道在平县），为人所杀。石勒奔乐平，（今山西翼宁道昔阳县，即故平定州乐平乡）与胡部大张弼督等（胡人一部之长呼为部大姓张氏名弼督），俱归汉。弥为荀晞弟纯所败，与其党刘灵亦降汉。汉以弥为镇东大将军、青徐二州牧、都督缘海诸军事。弥收集亡散，兵复大振。分遣诸将攻掠青、徐、兖、豫四州，遂入许昌。凉州刺史张轨遣督护北宫纯将兵卫京师，弥入自轘辕（关名，在今河南河洛道登封县西北轘辕岭），败官军于伊北（伊水之北在今洛阳城南），遂至洛阳，京师大震。司徒王衍督军出战，北宫纯募勇士百余人突阵。弥兵大败，走平阳。汉王渊遣兵寇平阳河东，皆陷之。徙都平阳，称皇帝。遣王弥、石勒连兵寇邺，冀州部内诸郡多陷。

三、洛阳之陷落怀帝之被弑

是时怀帝亲览大政，留心庶事，东海王越不悦，固求出镇许昌。越专执威权，而选用表请，尚书犹以旧制裁之，越怒，杀中书令缪播、帝舅散骑常侍王延等十余人。帝叹息流涕。越复使将军何伦领东海国兵入宿卫，尽罢殿省旧人，由是帝之左右皆为越党。汉兵屡寇洛阳，京师饥困。越遣使以羽檄征天下兵入援，卒无至者。流民王如作乱，寇南阳，击破荆州都督兵，大掠沔汉。朝议多欲迁都以避难，王衍以为不可，乃止。

永嘉四年（西历纪元三一〇年），汉主渊殂，太子和立，性猜忌无恩，杀顾命大臣齐王裕、鲁王隆等，其弟楚王聪弑而代之。以刘曜、王弥、石勒等为大将，连年南寇，勒击并王如兵，遂寇襄阳。东海王越以胡寇益盛，内不自安，乃戎服入见，请讨石勒。留何伦防察宫省，用王衍为军司，朝贤宿望悉为佐吏，名将劲卒咸入其府，于是宫省无复守卫，荒饥日甚，盗贼公行。越东屯于项（今河南开封道项城县）五阅月，逗留不敢进。青州刺史苟晞移檄州郡，陈越罪状，遣骑收越党尚书刘曾、侍中程延等，斩之，五年三月，越忧愤成疾而卒。众推王衍为元帅，衍推辞不敢当，奉越丧还葬东海，石勒以轻骑追及之于苦县（故城在今开封道，即故归德府鹿邑县东七十里），执衍等杀之，将士十余万人无一免者，越世子毗及宗室四十八王皆没于勒。苟晞表请迁都仓垣（县名，故城在今开封道祥符县东北晋兖州刺史治也），帝将从之，公卿犹豫不果行。既而洛阳饥困，人相食，百官流亡者什八九。帝将行，而卫从不备，无车舆，乃步出西掖门，至铜驼街，为盗所掠，不得进。是年六月，汉主聪使呼延晏将兵寇洛阳，刘曜、王弥、石勒皆引兵会之。破宣阳门（洛阳城西南门），入宫大掠，士民死者三万余人。发掘诸陵，焚宫庙，杀太子诠（清河康王遵子），执帝迁于平阳。拜左光禄大夫，封平阿公。逾年正月朔，聪宴群臣于光极殿，使帝著青衣行酒。晋故臣庾珉、王俊等不胜悲愤，因号哭，聪恶之。有告珉等谋以平阳应刘琨，聪遂杀珉等，并弑帝。时愍帝建兴元年，汉主聪嘉平三年，西历纪元三一三年也。计怀帝在位五年而被执，又逾一年而被弑，是为秦汉以后中国君

主被辱于戎狄之始，周幽王以后所仅见矣。

四、长安之陷落 愍帝之被弑

先是洛阳陷后，汉刘曜移兵寇长安，陷之，杀秦雍都督南阳王模。冯翊太守索琳、安夷护军曲允、安定太守贾匹等，谋复晋室，帅众五万向长安。雍州刺史曲特、新平太守竺恢、扶风太守梁综等以兵十万会之，大破刘曜于黄丘（故城在今关中道泾阳县西北七十里），又破刘粲于新丰，兵势大振。关西胡晋翕然响应；豫州刺史阎鼎奉皇侄秦王业（吴王晏子）入关，匹等迎置于雍城（雍县城也，在今陕西关中道凤翔县）。次年，进围长安。刘曜兵败，驱掠士女八万余口，走平阳。业入长安，匹等奉为皇太子，建行台。怀帝凶问至长安，皇太子举哀。因加元服，即帝位，以曲允、索琳为仆射。是时长安城中，户不盈百，蒿荆成林。公私有车四乘，百官无章服印绶，唯桑版署号而已。寻以琳为卫将军，领太尉，军国之事，悉以委之。汉兵屡寇长安，允、琳拒之，王师多败。允性仁厚，无威断，喜以爵位悦人。诸郡太守皆领征镇，村坞主帅小者犹假银青将军之号。然恩不及下，故诸将军骄恣，而士卒离怨。建兴四年（三一六年）十一月，刘曜兵逼长安。安定太守焦嵩、新平太守竺恢等引兵来救。皆畏汉兵强，不敢进。秦州都督南阳王保遣胡崧入援，击曜于灵台（周文王所筑在长安西四十里），破之。崧恐国威复振，则曲、索势盛，还屯槐里（县名，故城在今关中道兴平县东南十里）。曜攻陷长安外城，城中食尽，人相食。帝乘羊车肉袒出降，曜送帝于平阳。汉主聪以帝为光禄大夫，封怀宋侯。次年十一月，聪出畋，以帝行车骑将军，戎服执戟前导。见者指之曰：“此故长安天子也。”故老有泣者。十二月，聪飨群臣，使帝行酒洗爵。已而更衣，又使帝执盖。晋臣涕泣，有失声者，尚书郎辛宾起，抱帝大哭。聪怒，斩之。会洛阳守将赵固、河内太守郭默等伐汉，攻河东，扬言曰：“要当生缚刘粲以赎天子。”粲表聪请杀帝以绝晋望。聪遂弑帝。时晋元帝建武元年，汉主聪麟嘉二年，西历纪元三一七年也。

第二节 两赵之冲突与前赵之灭亡

一、刘氏之内乱

汉主聪淫暴，篡立以后，杀其嫡兄恭，蒸于其太后单氏。单氏之子太弟义屡以为言，单氏惭恚而卒，义宠由是渐衰。寻以其子粲谗（粲使其党靳准告义谋反），杀义。以粲为相国大单于，总百揆。粲少有俊才，自为宰相，骄奢专恣，远贤亲佞，严刻愎谏，国人皆恶之。中常侍王沈、郭猗等，宠幸用事。聪游宴后宫，或百日不出，政事一委粲。惟杀生除拜，乃使沈等入白。沈等多自以其私意决之，屡谗杀直臣，政刑紊乱。

晋元帝太兴元年（西历纪元三一八年）七月，聪殂，粲即位。太宰上洛王景、大司马济南王骥、大司空靳准等，受遗诏辅政。聪后四人，皆年未二十，粲多行无礼。准素有异志，谗杀景骥等。粲游宴后宫，军国之事，一决于准。是年八月，准勒兵升殿，执粲，杀之。刘氏男女无少长皆斩东市。发渊、聪二陵，斩聪尸，焚其庙。自称大将军、汉天王。刘曜闻乱，自长安赴之，至赤壁（水名，在今河东道安泽县，即故平阳府岳阳县），自立为帝。石勒引兵讨准，破其兵，将军乔泰、王腾等杀准，推准从弟明为主以拒勒。勒攻拔平阳，明奔赤壁。曜收其族，无少长皆斩之。勒遣左长史王修献捷于汉，汉主曜惑于修舍人曹平乐之馋（平乐留仕汉，言于曜曰：勒遣修来，实觐强弱，俟其得志，将袭乘舆。曜怒，斩修），斩修。勒大怒，与汉绝，刘、石相攻自此始矣。

二、石勒之势力扩张 王浚、刘琨之败没

石勒者，本上党武乡（今山西冀宁道，即故沁州武乡县）羯人，匈奴别部羌渠之胄也，有胆力，善骑射。惠帝中叶以后，并州大饥。刺史东嬴公腾执诸胡于山东，卖充军实，勒亦被掠，卖为茌平（今东临道茌平县）人师欢奴，欢奇其状貌而免之。勒乃与牧帅汲桑结壮士为群盗。惠帝永兴二年（西历纪元三〇五年），成都王颖故将公师藩起兵寇掠赵魏，桑与

勒帅数百骑赴之。兖州刺史荀晞击斩藩，桑与勒逃回苑中（即山东茌平县马牧苑），聚众声言为成都王报仇，所向辄克，遂入邳，杀冀州刺史新蔡王腾。是年七月，荀晞击斩桑，勒走降汉，屡寇冀州部内诸郡，百姓望风降附，勒众至十余万。集衣冠人物，别为君子营，以张宾为谋主，刁膺为股肱，夔安、孔苕、支雄、桃豹、逯明为爪牙，并州诸胡羯多从之，其势日盛。

洛阳陷后，太子诠弟豫章王端（清河康王遐子）东奔仓垣。司空荀晞奉为皇太子，建行台，徙屯蒙城（蒙县城也，在今开封道商丘县，即故归德府城北四十里），勒袭而执之。汉大将军王弥与勒外相亲而内相忌，勒诱而斩之，皆并其众，于是勒兵日强。汉主聪大怒，遣使让勒专害公辅，有无君之心，然犹加勒镇东大将军以慰其心。永嘉六年，勒引兵南掠豫州诸郡，临江而还，屯于葛陂（在今汝阳道汝南县，即故汝宁府城西南三十里），课农造舟，将攻建业。会大雨，三月不止，军中饥疫，死者大半。集将佐议所向，张宾劝以北据邺城以营河北，勒从之。引兵济河，是时并州刺史刘琨以兄子演镇邺，保三台（在邺城西北，皆因城为基，魏武帝所起，中曰铜雀台，高十丈；南曰金雀台，高八丈；北曰冰井台，高八丈；在今河南河北道临漳县）以自固。勒诸将欲攻之，张宾曰：“攻之未易猝拔，舍之彼将自溃。方今王彭祖（幽州刺史王浚）、刘越石（并州刺史刘琨），公之大敌也，宜先取之。且天下饥乱，明公拥兵羁旅，人无定志，非所以保万全，制四方也。不若择便地而据之，广聚粮储，西稟平阳，以图幽并，此霸王之业也。”勒从之，进据襄国（旧顺德府，今河北大名道邢台县）。分命诸将攻冀州郡县，运谷以输襄国，汉以勒为冀州牧。

是时河北藩镇，只余王浚、刘琨二人。琨屯晋阳，兵微将寡，西临强敌，其势岌岌。琨乃心王室，以扫平河朔为己任。结鲜卑拓跋部酋长猗卢为援，表封为代公，移其部落于陁（岭名，在今雁门道代县西北）北，以为应援。永嘉四年，上书东海王越，请出兵共讨刘聪、石勒。越忌荀晞为后患，不许。浚屯蓟城，拥重兵，专方面，以天下方乱，阴有帝制自为之意，欲结援夷狄，乃以一女妻鲜卑段部酋长务勿尘，表封为辽西公。洛阳陷后，自领尚书令，称受中诏，承制封拜，备置百官，列署征镇。琨长于招怀，而短于抚御。一日之中，虽归者

数千，而去者亦相继。琨遣其族人刘希合众于中山（今河北定县），幽州所统代郡、上谷、广宁之民多归之，众至三万。浚怒，遣燕相胡矩与段务勿尘之子疾陆眷，共攻希，杀之，驱掠三郡士民而去。石勒既据襄国，浚遣督护王昌帅诸军，及段疾陆眷、与弟匹磾、文鸯、从弟末杯攻之。末杯勇悍轻敌，乘胜逐击，为勒所执。疾陆眷以铠马金银赂勒，且以末杯三弟为质，而请末杯。诸将皆劝勒杀之，勒曰：“辽西鲜卑，健国也，与我素无仇讎，为王浚所使耳。今杀一人而结一国之怨，非计也。归之必深德我，不复为浚用矣。”乃遣其从子虎与疾陆眷盟，礼末杯而归之，由是段氏专心附勒。愍帝建兴元年，浚谋称尊号。前渤海太守刘亮、北海太守王抔、司空掾高柔切谏，浚皆杀之。燕国霍原志节清高，浚以尊号事问之，原不答，浚亦杀之，士民骇怨。而浚矜豪日甚，不亲政事，所任皆苛刻小人。勒用张宾计，两次遣使奉表称臣于浚，以骄其心，浚不悟。次年（建兴二年），勒袭陷蓟城，杀浚。以故尚书刘翰行幽州刺史，戍蓟，置守宰而还。翰不欲从勒，乃归段匹磾。匹磾遂据蓟城。

王浚既败，刘琨遂孤。琨素奢豪，喜声色。徐润以音律得幸，骄恣干预政事。护军令狐盛数以为言，琨收盛杀之。盛子泥奔汉，具言虚实。永嘉六年，汉主聪遣刘曜袭晋阳，陷之。琨奔常山，求救于代。代公猗卢自将救琨，大破曜于晋阳。曜走还平阳，琨徙屯阳曲（县名，今属冀宁道本旧太原府附郭首县），招集亡散。建兴元年，石勒攻陷邺城。二年，攻杀王浚。琨东西受敌，其势日危。然犹恃代为援，奏进猗卢爵为王，遣其从事莫含往佐之。建兴四年二月，代内乱，猗卢为其子六修所弑，勒乘隙西侵。是年十一月，击破琨兵，攻陷乐平（今山西冀宁道晋阳县），琨长史李弘据阳曲叛降勒。琨奔蓟依段匹磾。元帝大兴元年，匹磾之兄辽西公段疾陆眷卒，叔父涉复辰自立。从弟末杯杀而代之，南侵幽州，攻匹磾，匹磾兵败。石勒乘虚遣兵侵略幽州诸郡，皆下之。匹磾奔乐陵（今山东济南道乐陵县），依冀州刺史郡续。三年，勒攻乐陵，执续。四年，破厌次（故城在今济南道，即故武定府阳信县），匹磾与其弟文鸯皆死之，于是幽、冀、并三州皆入于勒。

太兴二年（西历纪元三一九年），勒自称赵王，是为后赵高祖。加张宾

大执法，专总朝政；以石虎为骠骑将军，督诸军。明帝太宁元年，虎引兵击青州，陷广固（故城在今胶东道益都县，即故青州府城西北八里），杀刺史曹嶷，于是青州亦入于后赵。进侵淮水流域，晋兵屡败，徐州刺史卞敦退保盱眙（今安徽淮泗道盱眙县）；兖州刺史郗鉴退屯合肥（今安徽安庆道合肥县）；豫州刺史祖约退屯寿春（今安徽淮泗道寿县）。明帝太宁三年，后赵将石生寇河南，司州刺史李矩、颍川太守郭默兵数败，乃附于前赵以求救。赵主曜自将击生，败绩。矩、默率众南归。于是司、豫、徐、兖四州皆入于后赵，以淮为境矣。

三、刘曜之末路

汉主曜之初即位也，迁都长安，改国号曰赵。秦州诸将张春、杨次杀都督南阳王保，保故将陈安降赵以讨贼，杀之，遂据上邽。陇上氐羌皆附于安，有众十余万，自称凉王。曜击安，斩之。氐羌皆送任请降，于是秦州入于赵。成帝咸和三年，后赵石虎攻赵蒲坂，曜自将击破，走之。遂围石生于金墉，决千金碣（在洛阳县城外）以灌之，荥阳野王皆降，襄国大震。后赵王勒自将救洛阳，击曜兵于城西，大破之。曜昏醉坠马，为后赵所执，见杀。曜太子熙与其兄南阳王胤奔长安，西保上邽（故城在今甘肃渭水道天水县西六十里）。次年，后赵石虎攻拔上邽，执熙、胤以下三千余人，皆杀之。前赵亡，凡传五主，二十六年（西历纪元三〇四至三二九）。雍、秦二州皆入于后赵，时东晋成帝咸和四年，赵主曜光初十三年，后赵王勒太和二年，西历纪元三二九年也。

第三节 前燕之勃兴与后赵之沦灭

上述之前赵、后赵皆为匈奴。继匈奴而兴者，则为东胡民族。东胡民族之根据地，在内蒙古东部。秦汉之交，为匈奴所灭。其遗族散保乌桓山及鲜卑山，因分为二大部落，以山名为部落号。三国时代，乌桓衰亡，其遗族半入于鲜卑，于是鲜卑独盛。西晋中叶以后，中原

多故，鲜卑人乘势分股南下，略取辽河流域及河北、山西北境，建立大国。其中崭露头角者有四，曰慕容氏、曰段氏、曰宇文氏、曰拓跋氏。

一、慕容氏之家世及其建国事迹

慕容氏之祖莫护跋，始自塞外入居辽西棘城（在今津海道，即故永平府昌黎县境内）之北。莫护跋生木延，木延生涉归，迁于辽东之北，世附中国，数从征讨有功，拜大单于。晋武帝太康四年（西历纪元二八三年），涉归卒，弟删篡立。六年，为其下所杀，部众迎立涉归之子廆。廆雄武，有智略，东侵扶餘（东夷国名，在今吉林西南境）。扶餘王依虑自杀。廆夷其国城，驱万余人而归。时宇文氏、段氏方强，数侵掠慕容氏，廆卑辞厚币以事之。段国单于阶以女妻廆，生皝、仁、昭三子。廆以辽东僻远，徙居徒河（故城在今辽沈道北镇县，即故锦州府广宁县）之青山。惠帝元康四年，徙居大棘城（今辽宁辽沈道义县），击宇文氏，大破之，自称大单于。又破鲜卑素喜木丸部，并其众。是时中国多故，士民避乱者，多北依幽州都督王浚。浚不能存抚，又政法不立，士民往往复去之。段氏兄弟专尚武勇，不礼士大夫。惟廆政事修明，爱重人物，故士民多归之。廆举其英俊，随才授任，国势益振。

长安陷后，廆遣使诣建康劝进。元帝即位，授廆龙骧将军、大单于，封昌黎公。平州刺史崔毖自以中州人望镇辽东，而士民多归廆，心不平，阴说高句骊（东夷国名，在今朝鲜北境与辽宁东境）、段氏、宇文氏，使共攻之。围棘城，廆闭门自守，独以牛酒犒宇文氏。二国疑宇文氏与廆有谋，各引兵归。时宇文氏兵强，带甲数十万，连营四十里。其大人悉独官将以独力攻廆，廆与子翰内外夹击，大破之。悉独官仅以身免，毖奔高句骊，廆遂取辽东，遣使来献捷。太兴四年（西历纪元三二一年），朝廷拜廆车骑将军、平州牧，封辽东公。成帝咸和八年（西历纪元三三三年），廆卒，世子皝立，自称燕王，是为前燕。是时辽西公段末埜已卒，子牙立。疾陆眷之孙辽弑之而自立，攻前燕，取柳城（今热河凌源县）。咸康四年（西历纪元三三八年），皝与后赵王虎合兵击破之，

拔其都城令支（县名，今津海道，即故永平府迁安县）。辽奔密云山，遣使请降于燕。皝迎归，杀之。段氏遂衰。

二、后赵之衰乱

晋成帝咸和八年（西历纪元三三三年），后赵主勒殂，太子弘立。九年，从兄虎弑而代之。虎残忍暴虐，尽杀勒子孙。大营宫室，横征暴敛，百姓怨叹。虎子邃、宣，皆凶狼暴厉，有父风，相继以谋大逆伏诛。段辽灭后，前燕与后赵接境，利害渐不相容。成帝咸康六年，虎合兵五十万，具船万艘，自河通海，运谷一百万斛于乐安城（在今津海道乐亭县境内），将大举击燕。燕王皝袭破高阳（国名，今河北保定道蠡县安肃博野等地），焚烧其积聚，赵兵乃还。八年，皝迁都龙城（今热河朝阳县）以逼赵。东击高句骊，破丸都（高句骊都城，在今辽宁东边道辑安县境内）。高句骊王钊请降。越二年（康帝建元二年西历纪元三四四年），复西击宇文部，灭之。其大人逸豆归走死漠北，宇文部由此散亡。又越二年（穆帝永和二年西历纪元三四六年），复袭扶餘，虏其王玄，于是东北诸小国皆羁縻于燕。

永和四年（西历纪元三四八年），皝殂，世子儁立。五年四月，后赵主虎殂，太子世立。其兄遵弑而代之。以虎养子冉闵都督中外诸军事。既而忌其勇，谋杀之。是年十一月，闵遂弑遵，立虎庶子鉴为帝。鉴又欲杀闵，闵知胡羯终不为己用，遂率赵人以诛胡羯，无贵贱男女少长皆杀之，死者二十余万人。其屯戍四方者，皆命赵人为将帅者诛之。或高鼻多须，滥死者半。六年闰正月，并弑鉴及虎孙三十八人，尽灭石氏，自称皇帝，改国号曰魏。鉴弟新兴王祗称帝于襄国，胡、羯、氐、羌、段氏、巴蛮六种人据州郡者皆应之，中原大乱，前燕王俊乘势南下，攻拔上蓟城，遂徙都之。七年二月，闵攻祗于襄国，祗求救于燕。燕王儁遣兵救之，击败闵兵，乘势略取幽冀部下诸郡。祗遣其将刘显攻邺，为闵所败。显惧，请降，求杀祗以自效，遂还，弑祗而自立。八年正月，闵复攻显，杀之。燕王儁乘衅遣其弟恪率师大举南下。是年四月，击闵于魏昌（县名，故城在今保定道无极县东北二十八里），大破，斩之。遂取邺城，自称皇帝，后赵亡。凡传七主，三十三年

(西历纪元三一九至三五—)。时晋穆帝永和八年，燕王儁元玺元年，西历纪元三五二年也。

第四节 前秦之勃兴与黄河流域之一统

一、前秦之建国

后赵衰亡以后，与鲜卑慕容氏同时并起角逐于黄河流域建立大国者，厥为前秦。前秦始祖蒲洪，本略阳临渭（县名，略阳郡治在今渭川道境内）氐酋，骁勇多权略，群氐畏服之。晋怀帝永嘉四年，自称护氐校尉、秦州刺史、略阳公。前赵主曜迁都长安，洪降于赵，曜封洪率义侯。前赵亡后，洪降于后赵。后赵王勒以洪监六夷军事。勒殂后，石虎徙秦雍民及氐羌数十万户以实东方，拜洪龙骧将军、流民都督，居枋头（故城在今河北道，即故卫辉府淇县南八里）。从击燕有功，拜都督六夷诸军事，封西平郡公。虎疾笃，拜洪都督雍秦诸军事，雍州刺史，进封略阳郡公。虎殂，遵立，罢洪都督，洪怒，归枋头。秦雍流民相帅西归，路由枋头，共推洪为主，众至十余万。是时后赵衰乱，洪阴有据关右之志。穆帝永和六年（西历纪元三五〇年），羌酋姚弋仲遣其子襄击洪，洪迎击破之。自称大都督、大将军、大单于、三秦王，改姓苻氏。故赵将麻秋鸩杀之，洪子健斩秋，自称晋征西大将军、都督关中诸军事、雍州刺史。率师西上，是时京兆杜洪据长安，健袭击，破之。三辅郡县皆降，遂入长安，自称皇帝，国号秦，是为前秦。分遣使者问民疾苦，搜罗俊异，轻徭薄赋，凡赵政之不利于民者皆罢之，民是以和。

十一年（西历纪元三五五年），健殂，子生立。性粗暴，尽杀顾命大臣太师鱼遵、丞相雷弱儿、太傅毛贵、司空王堕等。即位未几，后妃公卿以下至于仆隶，凡杀五百余人。群臣得保一日，如度十年。升平元年（西历纪元三五七年），从弟东海王坚弑之而自立。坚知人善任，以北海王猛为谋主，授以国政。举异才、修废职、课农桑、恤困穷、礼百

神、立学校、旌节义、继绝世，秦民大悦。

二、前燕之势力扩张

先是后赵末年，中原大乱，冉闵部下徐、兖、荆、豫、洛州皆来降。朝廷乘衅遣兵北伐，恢复河南、淮北诸郡。冉闵灭后，前燕与晋室接境，时起冲突。前燕主僞以其弟太原王恪为大司马，率师东略地，与段部酋长龔冲突。先是段辽为前燕所灭，弟兰收其遗民，居于令支（县名，故城在今河北津海道迁安县）。兰卒，龔领其众，因石氏之乱，南徙广固。晋穆帝永和七年（西历纪元三五一年），据青州来降，拜镇北将军，封齐公。十一年（西历纪元三五五年），恪引兵击之，破广固，执龔，尽取齐地。遂乘胜南下，侵略河南。升平四年（西历纪元三六〇年），俊殂，太子暕立。以恪为太宰，辅政。恪智勇兼济，屡破晋兵，尽取河南淮北州郡，国势日张。

三、前燕之衰亡

帝奕太和二年，恪卒。暕年幼不能亲政。叔祖上庸王评（虓子）以太傅辅政，贪谗媚嫉，黷货无厌。恪弟吴王垂，勇武知兵，善于治国。评忌其才能，不敢用。太和四年，大司马桓温率师伐燕，屡败其兵。进至枋头，评大惧，将奉暕奔龙城。垂自请率师逆战，大破晋兵，温走还。垂威名益振，评愈忌之，垂乃出奔秦。

秦王坚之初即位也，生弟晋公柳据蒲坂，赵公双据上邽，魏公庾据陕城；燕公武据安定，各举兵反。庾求救于燕，燕范阳王德请乘势发兵击秦。太傅评不听。秦讨柳等，皆斩之。国势渐固。

桓温之北伐也，暕遣使求救于秦，许割虎牢以西地。秦人救之，及温退而燕靳不与地，秦人以是怨之，有图燕之志，惮垂不敢发。及闻垂至，秦王坚大喜，郊迎，拜冠军将军。是年十二月，遣王猛等伐燕，取洛阳，河南风靡。次年，复伐燕，克壶关（汉县名，故城在今山西冀宁道长治县东），入晋阳，大破燕太傅评兵于潞川（即漳河在今冀宁道潞城县境）。遂入邺，执燕主暕送长安，前燕亡。凡传四主，五十年（西历纪元三二一

至三七〇)。司豫冀青幽并等州皆为秦所有。时晋帝奕太和五年，前燕主哱建熙十一年，前秦王坚建元六年，西历纪元三七〇年也。

四、仇池杨氏之兴亡

前燕已亡，东方无警。秦乃转锋西上，经略仇池。仇池杨氏之祖驹，本略阳清水（今渭川道清水县）氏人，始居仇池（山名，在今渭川道成县西北一百里）。仇池方百顷，其旁平地二十余里，四面斗绝而高，羊肠蟠道三十六回而上。至其孙千万，附魏，封为百顷王。千万孙飞龙浸强盛，徙居略阳，以其甥令狐茂搜为子。晋惠帝元康六年（西历纪元二九六年），茂搜避秦雍氏羌齐万年之乱，帅部落还保仇池，自号辅国将军、右贤王，关中人士避乱者多依之。愍帝建兴元年（西历纪元三一三年），遣其子难敌寇陷梁州，州人张咸等起兵逐之，以州降成。元帝建武元年（西历纪元三一七年），茂搜殂，子难敌立。与弟坚头分领部曲，难敌屯下辨（县名，武都郡属故城在今甘肃渭川道成县西），坚头屯河池（县名，故城在今甘肃渭川道徽县西）。前赵主曜自将击之，难敌兵败，请降，曜封为武都王。成帝咸和九年（西历纪元三三四年），难敌殂，子毅立。咸康三年（西历纪元三三七年），族兄初弑之而自立，称臣于后赵。桓温灭成以后，初遣使来称藩。诏授初雍州刺史，封仇池公。穆帝永和十一年（西历纪元三五五年），毅弟宋奴杀初，初子国复杀宋奴而自立。次年，国从父俊弑国，自立为仇池公。国子安奔前秦。升平四年（西历纪元三六〇年），俊殂，子世立，称臣于晋与前秦，为两属之国。帝奕太和五年（西历纪元三七〇年），世殂，子纂立，始与秦绝。秦王坚遣其宗室西县侯雅与杨安、王统等，帅师伐之。破仇池，纂降。雅送纂于长安。以安为南秦州都督，统为刺史，镇仇池。杨氏亡。凡传八主，七十六年（西历纪元二九六至三七一年）。时晋简文帝咸安元年，前秦王坚建元七年，仇池公纂十年，西历纪元三七一年也。

五、前凉张氏之兴亡

仇池既亡，前凉王张天锡惧，称藩入贡。张天锡者，故太尉凉州

牧西平武穆公轨之曾孙，司空凉州牧西平元公实之孙，大将军凉州刺史西平忠成公骏之子也。武穆公轨者，安定乌氏县人，汉赵景王耳十七代孙。惠帝永宁元年（西历纪元三一〇年），拜护羌校尉、凉州刺史。时州境盗贼纵横，鲜卑为寇。轨至，悉讨破之，威著西土。会刘、石乱起，洛阳长安相继沦陷。轨忠于王事，练兵筹饷，接济京师。战比有功，累拜太尉、凉州牧，封西平郡公。愍帝建兴二年，（西历纪元三一四年）薨，诸将奉世子寔嗣位，是为元公。史称之为曰前凉。寔绍述父志，世笃忠贞，屡遣兵入援长安。以功累拜司空、凉州牧，袭父爵。元帝太兴三年（西历纪元三二〇年），为妖人刘弘党羽所刺。世子骏幼，诸将奉寔弟茂嗣位，是为成公。乘前赵与陈安构兵之隙，略取陇西、南安（今兰山道故巩昌府），置秦州。陈安灭后，前赵主曜来攻，茂惧，遣使称藩，曜封茂为凉王。明帝太宁二年（西历纪元三二四年），薨。兄子骏嗣，是为忠成公。屡与前赵构兵，互有胜负。前赵亡后，骏与后赵接境，称臣纳贡以求免祸。屡遣使上表于建康，求联兵恢复中原。朝廷嘉之，累拜大将军、都督陕西雍秦凉州诸军事，袭爵西平公。骏勤修庶政，总御文武，咸得其用，民富兵强，远近称之。成帝咸康元年，遣将西伐龟兹、鄯善，西域诸国焉耆、于阗之属，皆诣姑臧（凉州治所故城在今武威县城东二里）朝贡。穆帝永和二年（西历纪元三四六年）薨。世子重华嗣，是为敬烈公。以谢艾为大将，屡破后赵兵。诏命袭父官爵，九年（西历纪元三五三年）薨。子曜灵才十岁，嗣位，是为哀公。重华庶兄祚弑而代之，恣为淫虐。杀重华妃裴氏及谢艾，自称凉王，改元，用天子礼乐。十一年（西历纪元三五五年），将军宋混等起兵讨斩之。而立曜灵之弟玄靛，去王号，仍称凉州牧，是为敬悼公。哀帝兴宁元年（西历纪元三六三年），叔父天锡弑之而自立，称藩于秦。秦王坚拜天锡大将军、凉州牧，封西平公。天锡荒于酒色，不亲庶务。孝武帝太元元年（西历纪元三七六年），秦遣将军苟萇、梁熙将兵击之。天锡将马建迎降，掌握战死。秦兵遂至姑臧，天锡面缚舆榼出降，凉亡。凡传九世，七十六年（西历纪元三〇一至三七六）。时秦王坚建元十二年，天锡嗣位后第十三年也。